

晚

晴

移

詩

匯

晚晴移詩匯卷一百六十目錄

劉徵 二首

吳廷香 三首

黃文達 四首

顧復初 八首

嚴恆 二首

覺羅廷爽 一首

于士祐 一首

于光襲 一首

魏燮鈞 三首

于雲升 一首

凌志珪 三首

吳恩熙 一首

汪汝式 五首

吳頤吉 二首

錢家吉 一首

焦光俊 二首

吳安謙 三首

王殿森 一首

石渠 一首

謝庭蘭 三首

魯贊 三首

林熙 一首

孫融一首

錢江一首

吳萃恩二首

王德馨二首

王壽四首

朱嘉金一首

朱炳清一首

高炳麟一首

曾諧二首

高鼎五首

姚陽元一首

袁振業一首

賽開來三首

趙繼馨二首

陳雲章三首

王尙辰三首

徐士怡二首

屠之連一首

田維翰三首

汪昶一首

王家仕三首

鄭先樸三首

黃仲騏二首

黃維申三首

劉秉堃 二首

羅廷琛 一首

黎兆熙 二首

王汝霖 一首

晚晴移詩匯卷一百六十

徐世昌

劉徵字礪薌吳縣人諸生成豐元年舉孝廉方正有歸
硯山房遺詩

憶秦淮

秣陵秋色自年年碧水紅闌映宛然隄上柳絲隄下舫縱
無煙雨亦堪憐

清尊檀板勸殷勤水榭風來笑語聞殘醉有人簾半倚酒
痕新上藕絲裙

吳廷香字蘭軒廬江人優貢咸豐元年舉孝廉方正殉
難有吳徵士集

棒檄橋觀打魚用杜公觀打魚韻

時賊據金陵

廬江近水非通津山梁漲雪堆如銀
冷父瀑下黃陂滿潑刺時復來游鱗
居民大罾船戶網圍橋觀者爭疑神
老饕得魚且佐酒雨餘几研無纖塵
王家鐵槍哥舒刀江南烽火連天高
武昌松江盡肥美亂流一網無遁逃
須知魚亦我所欲玉筋金盤總蕭瑟
長鯨鼓浪何時休底事吞舟坐相失

題張氏山居

烽火驚春老勞生此避喧那知亂山谷
中有小桃源新筍迸出土清泉流到門
杯盤真率處猶有古風存鸞鳳竄荆棘
豺狼當路衢干戈餘涕淚霜雪此頭顱
把酒不成醉請纓誰與俱勞生負邱壑
我亦許馳驅

黃文達字笠雨江甯人諸生有石菖蒲館詩鈔

詩話笠雨幼避寇亂僑居滬上以醫療貧癯好吟詠
時有佳句張獻山頗稱之長於詠物如寒菜云近市
問誰知此味閉門須識有奇才落葉云蹤跡不知何
處定飄零強作可憐紅野菊云獨立風前寒似我未
甘籬下偶依人饒有寄託

出門

清晨出門去路上人行稀山深寺鐘隱日杲秋露微流水
澄見底霜葉紅未飛行行若有得所得是無機

秋日村居

雞犬安眠世事忘避羣恰稱此村莊青山紅樹團茅屋秋
草荒煙冷夕陽不事繁華人自古絕佳風味稻生香溪南
好友相鄰近日往煙蘿話晝長

冬柳

江干老樹自成村無復婆娑舊日痕碧玉歌殘愁白下黃

金拋盡冷朱門數灣流水寒無色一抹斜陽瘦不溫小別
青溪經十載淒涼知否幾株存

嗚嗚寒吹撼旗亭榮落隨時亦慣經晚歲幾人傷老大飛
花前度感飄零鬢因點雪俄驚白眼不逢春未肯青回首
長隄燕沒盡六朝煙月夢初醒

顧復初字幼耕號道穆元和人有樂餘靜廉齋集

嘉定

羣山綠繞丹雲樹亂春愁石勢窺人落江聲抱佛流古傳
海棠國今上讀書樓縹緲三義影飛仙不可求

峽中雜詩

東風一萬里吹我挂帆西楚地緣江盡蠻天到蜀低春雲
歸雁遠山木亂猿嘯夜夜高堂夢鄉關怨鼓鼙

畫鼓闐闐咽丹從井底牽汰崖行白日鑿石出青天雲氣
學山立難聲如雨懸羨他下峽者驚電讓歸船
物候西南異爰知富媼材藥苗松乳雪蟲穴竹根雷泥煥
藏龍骨山寒孕虎胎蜀都誰續賦好借太沖才

犍爲塗次

乍見秋雲擁竹關俄驚涼氣到蘆灣一江帶雨全吞岸萬
樹搖風欲下山蒼鶻健蹲僧閣住白鷗亂趁釣舟還從知
隨處皆堪適祇在從容繫纜間

汶川

綿虎西去導江東土俗華夷控御同山色穠堆牛背上溪
聲亂入馬蹏中繩橋官路通區脫板屋人家似小戎今日
車書皆混一無入更說贊皇功

岳池曉發

起逐羣鳥出近關
岳池楊柳尙堪攀
曉煙晴日濛濛樹遠
水平田澹澹山歲稔
每聞人語好途長
翻覺客心閒不須
更說辭官去儘有
桃源在世間

秦中

陳倉北去別煙蘿
漠漠神皋電轉過
天外三峯朝白帝
關中八水走黃河
秦灰劫盡龍蛇遠
漢殿春空雉雀多
王氣伯圖俱滅沒
終南晴翠鬱嵯峨

嚴恆字立方號笠舫慈谿人有聽月樓詩鈔

詩話立方與弟益終身同處以友愛稱少學賈耽吟
詠與鍾學士駿聲輩相唱和學士采其佳句入詩話
又工繪事畫蘆雁得邊壽民遺意

舟中

空闊俯滄洲。乘風溯上游。斷雲千嶺樹。斜日一孤舟。吟興入秋遠。歸心逐水流。何當邀魯望。把釣狎閒鷗。

同友人夜泛月湖

水仙祠外西湖西。涼風吹浪湖外湄。垂楊掩映白沙裏。云是偃月錢公隄。片時月上畫樓東。雙橋影落霜鏡中。天涯塔火半明滅。數聲敲斷僧寺鐘。漁舟唱晚未歸去。輕歌漸入蘆花叢。舒王唱和詩中俠。月夜花晨時泛楫。一樽醉到十洲紅。紅潮色暈梨花頰。柔艣輕搖碧汜邊。香風暗度荷衣落。落花入座色紛紛。蕩漾羅衫欲舞人。采蓮高唱十洲曲。至今遺韻猶清新。紅蓮閣下香不改。賞花玩月人何在。嗟君行樂須及時。曦光未必終留待。洗盞更酌莫言歸。空令皓月流清輝。

覺羅廷爽字棠門號紫然有未弱冠集

詩話紫然爲語鈴中丞子年十有九刻詩集卽以未弱冠名之漁洋初刻榕箋堂集年十有五紫然雖未足擬之亦嗣佳公子也

登千佛山

幾日重陽過來登近郭山人行秋色裏峯倚亂雲間魯樹千重出齊煙九點閒新詩聊可寫收付錦囊還

于士祐字筠菴天津人諸生有南有吟亭詩草

偶憶蘇家橋

蘇家橋下路一棹入空濛遠樹黏天綠新荷出水紅雲山前度夢詩酒幾人同記得菰蒲裏推篷挹晚風

于光衷字阿璞滄州人諸生有翠芝山房詩草

詩話阿璞刻意爲詩摹溫李酷似海上謠一篇有絃外意

海上謠

秋色沈沈海水碧長鯨尾碎珊瑚赤五銖衣薄不勝秋娉
娥驚落銀蟾魄香索牽鈴護瓊藥玉梅裊裊寒煙裏瑤漿
誰肯貯晶盤雛鳳襍飛不起鱗脯紅灑桃花鹽蘭堂桂
燭跋重恹貝闕珠宮宴龍女修竹寒倚鉤湘簾五岳神圖
送阿母海若前驅蛟螭走好憑青鳥寄相思絳河迢遞空
回首冷雲漠漠獨自眠芙蓉花落仙城煙寶帶牽情入幽
夢搖空水綠天風連

魏燮鈞字公隱鐵嶺人貢生有九梅村詩集

塞上客夕

近塞春風大寒吹陰復晴沙塵羶日色草木聚邊聲野墜
荒雲黑山燒夜火明蕭條復誰慰竟夕獨淒清

還鄉

一年驚又臘風雪送歸程海上歲將盡天涯人獨征
依官成拙計負米困勞生更有高堂望迢迢念子情

岫巖秋望感興

乾坤萬里接風煙獨立蒼茫興浩然秋色西來通渤海
曉雲東望極朝鮮側身人世如遷客過眼光陰感暮年
牢落吾生終寂寞何須搔首問青天

于雲升字山來臨淄人有緣墅詩草

石橋望月

舍南舍北水爭流人靜橋空夜色幽漫倚闌干成小立
仰看明月恰當頭疏疏風散紅蓮渚淡淡煙橫白荻洲
隔浦鄰舟歸欲盡漁歌聲斷一天秋

凌志珪字桐叔江甯人有惜分陰館詩草瑣尾廬詩草
詩話桐叔爲包安吳弟子工書能詩幕游不仕全椒
薛慰農滕香館詩存有題凌桐叔瑣尾廬遺藁云天
判地棘真無柰瑣尾廬中抱膝吟一片商聲絃外應
六朝綺夢酒邊尋江河不廢王楊體蘅杜能傳屈宋
心太息昇平君未見斜川且喜
有遺音自注詰嗣耀生亦工詩

蘭陵舟中口號

擁裘枯坐靜如僧斷岸危橋樹幾層怪底歲除偏作客一
颿風雪下毘陵

弔都督湯貞愍公貽汾和楊西華作

又是重陽近登高感昔年王子貞愍公招同人重九會獅
窟園每值月之九日皆爲讌集
謂之展重陽直至歲
杪方止極一時之勝將軍真死難我輩愧生全風雨靈旗
壯星辰碧落懸故園何日返重訪舊林泉

一門留勁節三世効孤忠書畫乃餘事風流孰與同開樽

君興雅乞食我途窮嘉會難重遇因之感二公謂侯青甫文包慎伯

吳恩熙字菡青吳縣人諸生有教壽廬詩集

過紫金庵

人跡不到處杳然別有天山深猿獻果僧老鶴齊年塔影分奇樹鐘聲鏤暮煙扶筇覓歸路遙隔翠微巔

汪汝式字子經江甯人貢生有信芳閣詩存

詩話子經有孝行游幕皖江歲暮必歸省少與郡中名士何汝霖章沅周開麒讀書於城北竹居三年學大進偃蹇場屋以諸生終長於詩歌宮詞尤清麗可誦

泰陵詞

汾水秋風起雁塵無端歌舞淚痕新玉環誰鏤琵琶字已兆江山屬美人

望京樓上按伊涼秋雨霖鈴恨轉長一局殘棋悲往事老
臣猶說幙頭香

奉聖山閣

有水有山處高秋一倚闌樹聲村店晚草色野橋寒破艇
游鱗聚危峯獨鳥盤人家漸鐙火歸路更漫漫

古意

裁取吳綾被褚綿復褚絲厚薄郎不言冷暝儂自知

雨花臺

同泰金錢贖帝子江南好佛生歡喜雲光說法天雨花繽
紛四面飛紅紫吁嗟雨花不雨粟空使臺城鬼夜哭登臺
不見講經人西風吹澹秋山綠

吳頤吉字少溪武進人諸生有仙蝶樓詩存

過鄭村弔覺華菴

覺華古禪院代謝成千秋憶昔少年日來登雲外樓詩人
忽已往法相安可求歎息不能去徘徊上廢邱

邵竹嶼過訪

種瓜東陵下瓜美甘如飴迢迢碧溪水喬木影參差中有
讀書處夢寐常見之樓前花木茂百本多離奇階下秀蘭
草春夏何葳蕤結構念先澤栽培勤灌滋流連動過客況
忝座中師世運有代謝人生感別離紛紛樹間鳥巢覆無
棲枝展轉雉皋下季女常苦飢徘徊虞山道旅人喪斧資
好古犯天忌飛電逐蛟螭龍眠寫生手破壁騎金獅囊空
竟羞澀矯首猶伸眉欲從季主卜前路曷可推江南兵未
罷旋歸定何時

錢家吉字辛生吳縣籍金匱人諸生有寄生吟草

南錢雜賦

養拙何妨懶幽居不厭貧小橋低壓水亂柳密迷津風月
宜佳客江南有散人陽山嵐翠合閒眺一怡神

焦光俊字章民江甯人諸生有耐菴詩鈔

二月晦日夜坐

繁雲羃羃雨絲絲寂寞荒城夜柝遲惆悵江南消息斷春
陰又過杏花時

有感

北狩天王出東征介弟才烽煙三輔急宮殿九成災烏室
飄搖感鵠原急難懷朝廷終不改誰促六龍回

吳安謙字益夫號秋谿江蘇清河人諸生有聽雨草堂

詩存

詩話秋谿少致力於詩常有句云溝水何時能到海
閒雲終日不歸山尹耕雲見之歎曰亡則工矣非廊
廟中人語也果

雜興

松柏入塵市價不及桃李生無媚世姿安與眾競美達人
守其真賞心空谷裏靜極虛妙生萬事不到耳行樂根性
命性命寄山水悠悠天地間幾人悟至理

鳳凰游海濱寥寥寡儔侶繁豈無羽族仙凡難雜處翺翺
千仞上不見鸞鶴舉俯視蓬蒿中燕雀集幾許同鳴鮮好
音志在得其所物各以類聚達哉先民語

讀書辨真僞豈以論屈伸小儒矜片長盛氣壓羣倫溝澮
小滄海邱垤卑崑崙昧者不自量誰與指迷津宣尼稱至

聖不敢居智仁堯舜獨千古淵衷遜臣鄰胡爲蚩蚩輩輒欲多上人

王殿森字月巢寶應人貢生有補梅詩鈔

秋蘭

閒庭習幽靜清香透書帷起視盆中蘭娟娟開一枝秋光倏已晚爾開何獨遲風聲撼林薄霜痕沾鬢絲孤芳孰延賞知音安可期我亦素心人何時慰幽思

石渠字梅孫吳縣人諸生有葵青居詩錄

八月初十夜坐月

庭窄不容月開窗偶見之憐余久飄泊似爾亦分離今夕重相對何人慰所思從知盈則蝕惜此未圓時

謝庭蘭字湘谷丹徒人諸生有湘谷吟藁

晚眺

落照沒前嶺紫翠千重深清風松下來微涼入我襟歸羊
散村墟宿鳥趨空林垂釣者誰子暝坐煙中潯

暨陽上元

鄉國渺何許天涯春色歸無家悲令節有淚溼征衣宿麥
連雲秀殘梅作雪飛烽煙燭江表遠夢繞漁磯

射陵謁陸丞相祠

海氣昏昏落照邊厓山風雨尙依然濤頭白馬坐前侶水
底蒼龍死後天虛閣松聲疑敵騎寢堂竹韻宿寒鳶可憐
襟上斑斑淚留得千秋碧血鮮

魯蕢字仲實江蘇山陽人諸生有仲實詩存

獨坐

獨坐愁無賴蒼天不肯晴鄰雞都一哭尊酒且三更太息
庭芳爛生憎簷溜傾蹉跎兵甲外伏枕淚交橫

古意贈今人

長繩繫落日潛從根九淵如何將微絲至意深纏綿憶君
不相識見君情轉戚十年抱夙悃涕泗橫君膝誰謂南山
鳥枉就北山羅夢眼悽心魂蝴蝶相經過殷勤託芳素贈
君合歡褥合歡那所量團扇潔如玉豈期浮萍草轉作楊
花飛嫦娥竊無藥三五愁雲欺宛轉復宛轉春風吹髮短
忍復摧燒之留此明人眼金刀莫剪爪剪爪爪痕枯出門
莫振衣振衣絕衣裾衣帶日以寬離懷日以永當戶疑有
人愁見庭樹影肅肅西征鴻洋洋東逝魚爲君前致詞努
力籌良圖良圖誠所願長夜何時旦願將身化石從此填

銀漢

歲晏行

歲晏朔風百憂集步出東門西門入桁上無衣囊無錢妻
孥何用苦煎急自從師興官帑虛公私坐困枯魚泣水衡
少府仰屋愁變通改鑄聊取給法權輕重遞減半重者當
百輕當十一當百十官與民民轉輸官官怒嗔通風啞板
目色新官局沙汰何其頻且如南河幣用楮吏俸兵糧皆
賜予龍文寶印空鏤錯一紙千錢誰給汝烏乎四海愁風
塵朝法暮制徒紛紛長沙諫鑄流千載誰是當今痛哭人
林熙字紹眉侯官人有井窗蛩吟

過道山小石室感舊

眼底蠻花匝地斑仙關今昔異躋攀幾行墨跡猶留壁一

片泉流不在山惆悵重來黃葉下蒼茫獨立夕陽間多情最是巖巖石依舊逢人不解顏

孫沁字次公秀水人有始有廬詩藁

登湯山晚眺

茫茫百感此胸中極目天涯劫燒空危堞遠迷春樹碧夕陽亂逐晚潮紅江山凜冽餘兵氣壁壘荒殘弔鬼雄萬戶瘡痍猶未復時和扇暝藉春風

錢江字東平長興人諸生有六朝雜詠

詩話東平負經世之略咸豐中寇亂佐雷副憲以謫幕創立釐捐藉以餽軍或讒於副憲卽座上殺之宋陳邁創經制錢殉於中山亭林深譏之然邁猶死事東平得視邁爲更烈矣

邗江雜感

草野猶懷救國忠而今往事哭秋風桓劉有意爭雄長韓

岳終難立戰功滄海風濤沈草檄關山霜雪轉飛蓬恩恩
過眼皆陳跡往日雄心付水中

吳萃恩字聚泉嘉興人有南湖百詠

沈珪墨

二李而還數秀州烏金十笏豹囊收對膠莫道堅於石容
易磨人到白頭

曹用筆

君家譽重建安文餘技中書又策勲留畫丹青引中馬風
流長憶故將軍

王德馨字仲蘭永嘉人諸生有雪蕉齋詩鈔

夏夜

衡門客散靜無譁唧唧蟲聲透碧紗消得夜涼清似水雨

餘殘月在荷花

雨後小齋獨坐

檐溜初停日已斜坐看樹影上窗紗
悠揚琴韻風敲竹滴瀝脂痕雨洗花
老去世情如嚼蠟春來詩思又萌芽
小齋莫更嫌岑寂鼓吹新添兩部蛙

王壽字補樓嘉興人有玉樹堂詩藁

苦雨

世事逼杜門拙身謝塵俗枯坐一室中
天寒肌生粟苦雨聲蕭蕭晝夜無斷續
年荒百物貴催租吏猶酷四野聞捉人
貧窮遭撻辱可憐旁觀者敢怒不敢哭

市上少行人淚灑家家雨屈指已數旬
千里無乾土重雲蔽青天日光黯不吐
安得製大裘手自蓋萬戶海大尙可

填天漏詎弗補吁嗟庸碌碌徒云恩難普

我家有恆產八口飽未能我家有恆業利薄賈益騰我愛
讀我書使我心有恆澹泊足養性營求徒取憎矧此利所
在反覆不足馮我心祇危懼省身惕履冰

苔痕綠滿庭客蹤絕已久有約復不來獨酌杯中酒日暮
發狂歌兒童齊拍手笑我醉且顛張膽竟如斗拔劍怒衝
冠大聲忽鯨吼飛身欲上天撥開雲霧走

朱嘉金字少谿號曼翁嘉興人諸生有臞仙吟館遺藁
花田

水苗初秀雨餘天極目蒼茫起暮煙一水綠環孤塔外數
峯青到夕陽邊風塵未厭彈長鋏行李何妨笑半肩誰識
苦吟江上客權歌聲裏過花田

朱炳清字小泉海鹽人諸生有碧琅玕館詩鈔晚翠樓詩鈔

獨桑鼓歌

奇渥溫氏國祚銷赤眉銅馬如蝟毛壽輝文俊相繼沒士
誠友諒爭咆哮陳氏沔陽漁人子比似張氏尤虎視太平
城陷攻南昌連舟縱戰紛弓矢劉項不知誰得鹿此鼓逢
逢聲未死日月並行明主來俊傑搜羅文武材龍蟠虎踞
形勝定帝業乃自金陵開築牆必高儲粟廣渡江叱咤生
風雷維方與胡皆歸附至誠相與誰疑猜陳氏戰艦猶敢
拒蟻聚蜂屯血漂杵采石磯邊鵝鵲軍鄱陽湖上熊羆旅
螟蝗旣死留螻蛄一葉扁舟匿煙渚沙蟲猿鶴軍不歸獨
留此鼓歸真主滄桑轉瞬年代更飢饉蠶跡塵縱橫蓮界

深藏留舊物以桴擊之猶哀鳴月落空山發淒嘯煙寒古
寺埋精英鬼物搗呵煩守護祇恐仍引刀兵聲鏤金製牀
水晶漏豪華召禍天不宥釁血爛斑此鼓存闕盡興亡誰
共壽陳倉石鼓太廟前諸葛銅鼓棧道邊彼則遵法此垂
戒常伴沙衲年復年或謂此鼓本屬東吳物赤壁大戰聲
闐闐豈知代遠年湮不可考莫若明初所得傳無愆敗皮
做網皆有用此鼓精藍共清供茫茫古物人推尊荒榛銅
狄知誰重夜深風雨來靈魂啾啾疑是嘯黃昏圍一丈餘
高三丈金粟古剎藏山門摩挲片刻游山頂松聲又作涼
濤喧

高炳麟字昭伯仁和人諸生有我盒遺橐

詩話昭伯幼損一目性穎慧爲詩文皆學韓退之詩不多作以體弱早卒

禹陵詩

維年癸丑春二月我來會稽探禹穴乍看廟貌極巍峩松
柏森然動魂魄陰崖疑有鬼神護深澤或恐龍蛇出八年
自昔集輶櫟萬國於茲朝玉帛生前宮室制不崇葬後山
林無改列烏耘後世不可知三寸桐棺此遺跡俗儒小生
好傳會往往神奇騁其說金簡綠字競侈陳童律庚辰矜
創獲不感明德誇異聞罔識當年疏濬策遂令四載隨刊
功徒爲神仙飾鴻烈豈知禹貢紀方略不用山經紛詭譎
往者洪流徧中國下民昏墊何由釋帝咨岳牧驚懷襄天
顧蒸氓生聖哲北安冀充載壺口南治荆揚過震澤九河
其濬九州同四海分流四隩宅迺因土地定征賦竟奠山
川免巢窟貢金鑄鼎罔雨避班師舞羽苗民格身成績用

蠱終幹民盡謳歌世難絕東巡會稽事如昨祀典煌煌重
於越遐思終古此區宇經幾聖神爲計畫盤皇闢地媧補
天載筆荒唐賢者斥羲農軒轅邈相嬗禮樂兵刑漸增設
仙用耒耨漁網罟陸居棟宇水舟楫唐虞考績先五臣百
姓昭明萬邦協當時禹亦共賡颺獨錫元圭登北闕後來
湯武及周孔征誅筆削嚴斧鉞是皆功與姒王並天壤紛
紛留墓碣我生好古先此覽不覺涕零霑窆石井渫山阿
永自深碑存亭畔猶無缺荒祠拜手獨歸去夕陽西下波
聲咽

曾諧字小石永嘉人諸生有小石詩鈔

雨後

秋在芭蕉上涼生枕簟間蟲聲繁似雨樹影黑疑山夜盡

鐙先施蚊稀扇亦閒安身惟睡好及早掩松關

過白蓮塘作

老樹蕭疏咽暮蟬西郊無復舊人煙風清月曉橫塘路秋夢依稀墮白蓮

高鼎字象一又字拙吾仁和人
有拙吾詩藁

懷李嘯雲

吳苑文章客餘溪落拓身一生惟愛酒萬語不言貧
依隱常安拙相交只率真記從分短袂又度兩重春

虛堂

虛堂獨自掩疏櫺久客天涯醉亦醒廿載江湖雙眼白
五更風雨一鐙青艱危已覺塵心淡魂夢猶驚戰血腥祇爲
深恩酬未得琴書何暇歎飄零

早行

一葉西風裏催程曙色微
水流殘夢急帆帶落星飛
宿鳥未離樹寒潮欲上磯
江湖無遠近莫問幾時歸

偶書

高樓人去碧天長
點點帆迎落日黃
敢冀舟中逢謝尚
漫勞市上識韓康
喪家畢竟非秦贅
憫世何曾是楚狂
二十年來尤守拙
白雲滄海總茫茫

秋宵懷湖上

蕭疏樹影過西牆
殘月溶溶到草堂
秋景最清尤在夜
客居雖好總懷鄉
延青水榭吟詩舫
飲淥山莊鬪酒場
一自孫盧蹂躪後
悲風烽火歎枯楊

姚陽元字舒堂歸安人有春草堂遺藁

游永樂寺

白雲圍野墅萬木抱珠宮
泉激林端雨樓吞天外風
梵餘清磬遠嘯徹暮山空
別有真禪味冥心月正中

袁振業字潤甫桐廬人有榆園雜興詩

和趙友農四丈獨釣

朝穿霧樹出晚度石橋迴
柳影魚方唼萍皴鷺忽開
危躑或有石標寄不名臺
兼分藥苗種時隨樵采來
沽得村醪
巖歡迎穉子哈

賽開來字竹樓和州人有種竹軒詩草

鎮淮樓

鼓角重關地干戈百戰場
風雲挾淮泗兵火半齊梁
塔影摩空盡江流繞郭長
疏林看木落秋思入蒼茫

讀四溟山人集懷計甫草先生

眇目山翁謝四溟
鄴城風雨太飄零
黃金肯築詩人墓
見說吳江計改亭

春日病起送陳皋甫張小山之皖

絲雨霏霏日望庚
小窗吟苦句難成
人於久病偏愁冷
天爲衰齡特放晴
百歲光陰如過客
一年時節又清明
故人喜說皆強健
肯爲貧官到皖城

趙繼馨字花農太湖人有小有花竹軒詩鈔

和李海初殿撰田家小飲韻

曲曲池連屋中藏
太古民塵原無處
著俗是本來
清秋色無今古
深情孰主賓
家貧具樽酒
還勝舊醅醇

卅年爲一世
人往水流西
舊是登臨地
新添菜麥畦
老翁

閒倚杖往事說無稽何限存亡感滄桑事不齊

陳雲章字亦昭合肥人有卧雲山館詩存

送王敬亭

學懋

攝六安校官並監茶稅

孝廉船舶不驚波閒愛衙齋長綠莎郭外軍機鐃吹曲山中詩興採茶歌泮林花發官何冷親舍雲瞻路未多猶望王曾酬大志文章有價重巍科

聞童晉侯店作詩已之

東牀風雨病羲之欲寫黃庭力不支祝爾從今須健飯龍賓十二待臨池

贈趙若琴

君有連城璧磨礪偉器成襟懷觀物達肝膽照人明祕籍金樓子良田玉帶生簡書猿鳥畏風雨幾經營

王尙辰字伯垣合肥人諸生有謙齋詩集

戊申春日游逍遙津

芳草滿汀洲繁花散遠疇野橋支曲徑急雨亂春流樹暗
聞嘯鳥波平看浴鷗柴門臨水近罷釣繫漁舟

龍江待風

纔別青谿第一程扁舟泊處晚潮生烏嘯老木霜無跡雁
渡寒江月有聲振觸鄉愁傾薄酒商量畫橈翦孤檠朝來
順水揚舲去兩岸青山遞送迎

七里河待渡

趁墟小聚岸沙邊渡口無人待放船附郭魚鮮爭入市傍
山水足早耕田嵐光破日沈花塢霜氣侵晨養麥天欲向

七門尋廟記囊中尙有拓碑錢

劉貢父有
七門廟記

徐士怡字棣友石埭人有寄生山館詩贖

三多鎮對月感懷

迢迢數百里渺與故鄉隔已作江北人仍看江南月彼美
居一方亂後無消息共此嬋娟明恨少雙飛翼愁隨落葉
添心共孤鴻滅相思復相思徘徊淚盈臆

晚發京口

大江流不斷愁共暮潮生水激山皆走波翻月有聲亂離
朋輩少旅夜客心驚樂土知何處揚帆且北征
屠之連字雲洲孝感人有雪軒詩草

村居晚照

清溪村路繞落日入林斜暝色斂微樹春愁結晚花蔚深
藏鳥道幽僻隱人家更有閒居樂開樽醉月華

田維翰字西園號半翁漢陽人有子固齋詩存

詩話西園先世本上虞人後遷漢陽遂著籍焉幼失怙事母至孝粵匪亂起奉母歸浙治鄉團禦賊有名後歸漢陽治離政手訂淮網鹽法輯要一書喜爲詩歌所至之處一時名士咸從之游

十月十四日夜泊荷葉洲對月有懷

譙鼓聲初動清光已滿天遙憐千里共尙欠一分圓隔岸誰家笛長江客夜船羈人當此夕觸緒未成眠

由七濠口至瓜步

片帆孤影出邗溝颯颯東風送客舟雲氣連山浮鐵甕蘆花繞岸過瓜洲江聲不盡當年恨霜信初傳此日秋況是妖氛猶未靖暮笳幽咽不勝愁

新居落成賦此自賀兼柬鏡仁

幾載江頭把釣竿煙波坐老石磯寒敢云狡兔營三窟且

學閒鷗占一灘出入有車彈鋏易棲遲無地立錐難鳩居
未合誇元九不近蓬萊亦自安

汪昶字韻和漢陽人有柏井集

送楊利叔

象濟

東歸

自慨無交事事非故人又報動征騂黃花香後三秋老紅
葉聲中一棹歸鼙鼓東南民力竭風塵書劍壯心違可能
借我凌雲筆化作陽戈挽落暉

王家仕字信甫監利人有彤雲閣遺詩

東黃記室

刀環龍雀醉頻看辛苦長征出塞彈上將軍中隨李牧貴
人門下作任安三春戰血憑鵑灑五夜鄉心逐雁寒陽羨
買田歸未得十年鴻爪徧江干

題畫

樂游原上醉呼鷹雲擁將軍獵騎騰憑弔不堪還駐馬西風殘照漢家陵

兵書峽

誰將韜略鎖崎嶇風后軒皇籍有無但喜嵐光容蠟屐下求兵法悟陰符魚龍陣掩三巴路風雨靈飛六甲圖何似玉皇香案吏更探瓊笈上清都

鄭先樸字尺古號久惺長沙人諸生殉難有求是齋集詩話久惺嗜古力學以養母不出倉卒授命善化賀仲肅序其詩集謂詩可以觀人之所遇君詩有和平之響無志微噍殺之音宜其所遇皆坦途而卒及於難偶不可解也

雨後游嶽麓山

微雨如膏沐妝成嶽麓春碧霑楓葉嫩紅溼野花新帆影

辭家客書聲閉戶人自卑亭畔路游眺幾逡巡

讀韓詩

酒力如春風入眼能生花好書如故人相對宜擎茶醉讀
昌黎詩萬象莽無涯寶鼎留古字逼視驚聲牙情鏡寫物
形酷肖無舛差有時恣恢奇月黑鬼盈車有時出清新日
升天捲霞大巧反若拙夸目時尙奢儻有絃外音千古惟
一家

新晴出游

杜門不出惟看雨天地模糊水氣濃忽捲煙雲生霽色起
尋山水散愁容春回千嶂銅生綠日晃一溪金在鎔簞笠
滿原秧滿野果然久雨不妨農

黃仲馭字正夫郴州人諸生有醉山草堂詩集

水寨嶺

上山復下山踰險還入險潛踏巨鼇背跼步形神斂四圍
嵐嶺合一綫走崖广不識經過處炊煙幾萬點明明見高
峯飄忽雲際掩一曲復一重密蒙亂風颭最下光明界乃
見桃花嶼淨掃舊衣襟煙痕淡如染

暮歸

微雨涇涼煙暮色靄然至鐘聲出白雲知有雲中寺草根
亂蟲鳴列星森就位遠火照江村流螢忽如墜浩歌下煙
蘿一靜了萬類

黃維申字笏堂善化人諸生有報暉草堂詩集

寄別家華夫兄

君昔豫章去今吾皖道游共成千里別各抱百年憂落

江湖感飄飄身世浮賞音何處是楚水自東流

次韻孫壽朋感懷之作

青衫寥落十年身始信窮通本夙因詩興每從愁裏發人
情惟有醉時眞事當失意才知命話到無言更愴神畢竟
詩書非誤我歧途偏得賞心人

偕丁味齋二尹登太平城內荒亭

落日閉重關荒亭此共攀一城餘白骨四面見青山破屋
無人到深林有鳥還家鄉何處是搔首暮雲間

劉秉堃字敦山萬縣人

答杜唐偃訊蔣吉亭所贈鐵笛次韻

六州之鐵不鑄錯錚錚蔣生人中豪治鐵鑿孔作橫吹鳴
之鳴鳴山月高粉黥丹黥易此笛從茲當廢蘄州竹小杜

作詩問詭譎涼吹漢部將安屬
臂發箏琶皆凡響羌管修長此
獨縮律中黃鐘絳憐漾竭來爲
君歌一曲水龍吟罷海天青湘
靈一奏蘅蕪綠那無勞叨咎山
鬼只合賞音索木客不然獨洗
耳塵情一聲吹裂山頭石

雨

十日愁霖不出村溪煙山霧晝
長昏木綿積雨多辭樹水氣如
雲欲到門無復故人話朝夕偶
從田父牧雞豚舍南賸有羣鷗
至極目荒塍滿稻孫

羅廷琛字蓮谿南海人有誦芬堂詩草

野眺

春水參差漲野塘低田三月始
分秧疏疏看過酴醾雨曲曲行
隨薜荔牆深樹鳴鳩桑甚紫午
風團蝶菜花黃石橋

邇池村西路時有人家煮繭香

黎兆熙字仲咸遵義人監生有野茶岡人吟藁

巴東夜泊

臘日辭家長作客高歌獨對寒天碧獵獵江風吹破裘愁
共波高一千尺牛口灘頭霜月明秋風亭下暮禱生危檣
夜泊巴東縣聽盡哀猿冷雁聲

金陵別方仲堅

凝

秣陵三月路如何料峭東風捲白波早趁寒潮別君去過
江煙柳雨絲多

王汝霖字澤民甕安人諸生有鹿仙吟草

詩話澤民至孝胡文忠嘗榜其廬
詩多數漢魏樂府近體亦雋雅

河池州

繞郭平池十里長
人家倒映水中央
黔山只在層山外
望望秋雲木葉黃

晚晴簃詩匯卷一百六十終

晚晴移詩匯卷一百六十一目錄

許庚身 一首

朱迢然 一首

謝維藩 五首

馬丕瑤 一首

吳鴻恩 一首

平步青 二首

仇炳台 一首

袁保齡 三首

劉鳳紀 四首

陳昌年 二首

吳重熹 十二首

朱鶴瀛 七首

勞乃寬 四首

周長庚 四首

丁謙 四首

田延年 五首

張祖同 十一首

黃體芳 六首

許振禪 十六首

李嘉樂 二首

趙國華 十七首

許玉璩 六首

丁蓉綬二首

朱鑑成一首

沈昌宇七首

晚晴移詩匯卷一百六十一

徐世昌

許庚身字星叔錢塘人同治壬戌進士由中書官至兵

部尙書太子少保諡恭愼

詩話恭愼師爲文恪公猶子相傳當文恪公長夏官時有術士相其先墓言當再出一兵部尙書至恭愼師而驗師由中書久直樞垣以謹密受知中興詔書多出其手洊陟正卿未離政地余昔在詞館嘗從請謁其門如水易名以執事堅固小心敬畏爲義稱其素行也

題文恪公送楊邁公中丞還朝詩冊

三年膏雨頌聲馳敬展先臣述德詩故里尙留何武愛前
徽兼觸阮咸思淵源累世龍門遠清白相傳燕翼貽東魯
好修循吏傳紹承閎闕佐明時

朱道然字肯夫號味蓮餘姚人同治壬戌進士改庶吉

士授編修厯官詹事

渡汨羅江

行盡沅湘路征驂又汨羅淺沙猶擁渡流水自生波古戍明楓橘餘香歇芰荷中流漁父過不敢扣舷歌

謝維藩字翊天號麀伯又號振士巴陵人同治壬戌進士改庶吉士授編修有雪青閣集

詩話麀伯湘人而生長秦中得西北高壯蒼涼之氣詩宗法少陵集中皆思親懷友憫亂傷離之作麀伯早入承明屢司文柄顧一掃當時館閣槩美之習可謂能自振拔者矣

送王柳坪比部式言出塞

拂天花雨停金樽輪臺萬里風雲昏故人佩劍將西征青絲絡馬咸陽津咸陽楊柳玉關雪美人如花馬如血旣廬絃管迴春風廢磧骷髏照寒月吁嗟窮臣出塞古所悲辭

隔天日來荒陲不遑將母瘁王事側身掩涕今何時中原
年來疲撻伐野番窺邊時竊發戰士飢搜黑水魚將軍勇
墮天山鵲願君袖石奠崑崙他年待君神武門

懷慶道中

王屋風煙捲客旌覃懷古道接漳衡雨餘萬木綠成海戰
後新苔紅上城四國金湯推健壘連村刀劍誤春耕眼前
擊櫂波如砥南下河流慨不平

勞生

野色起平陰蒼然萬里心勞生感行役吾道托孤吟華嶽
歸雲迴茅津落日深拊膺思骨肉欲語重沾襟

送王斗坪同年

霖之榆林

吹笛山樓秋月清故人匹馬向邊城木蘭東去瞻天近莫

作尋常出塞聲

野人送菜感賦

僦室邇菜圃寒綠侵書樓歲除饋盈把野人意綢繆苦言
今冬冷地凍菜不稠強能飽妻子天賜固已優城外兵過
地千家但空疇搜括及筐篚何能問秋收盜賊所未屠餓
死骨滿溝主兵匪不嚴耳目誠難周連營壓漢水笙歌進
珍羞朝廷方用兵小民何敢尤述罷歎息去輟食淚雨流
馬丕瑤字玉山安陽人同治壬戌進士官至廣東巡撫
有珠溪存藁

題李劍秋大令勸農圖

催科不擾政刑清雨後來聽叱犢聲綠野無邊生意滿
花香裏看春耕

吳鴻恩字澤民號春海銅梁人同治壬戌進士改庶吉

士授編修歷官山西冀甯道署布政使

詩話咸同之際京朝官以四書文擅名者陽湖朱雪
陸侍郎儀訓江陰陳子惠農部榮紹及春海爲最門
弟子皆極盛初有登瀛社朱陳二君主之其後春海
設觀善堂集課與山陰傅子蕓戎部鍾麟迭主之至
光緒中長白錫之都護豫師又設會輔堂其時風氣
漸變無復曩時之盛春海官御史屢上封事出守甯
武有政聲非僅以制舉文字爲長也

重九龍巖登高

纔報蘭秋又菊秋重陽重到藿川游亭高風急鳴蟬翼巖
古雲生傍馬頭祭野彌增霜露感催租漫作稻粱謀故鄉
山好難爲別人去還因桂樹留

平步青字景孫號棟山又號侶霞浙江山陰人同治壬
戌進士歷官江西糧道有越吟殘草

詩話景孫官翰林入直上書房勤於纂述有國朝館
選爵里謚法攷續三卷兩書房諸臣攷略各二卷大
考翰詹攷略一卷皆有裨玉堂掌故及出任江西糧
道月必倩人購書於都中藏肆爲攷訂之用歸里後
杜門謝客一意著書橐本甚富身後其家視作祕笈
絕不示人有手訂香雪庵叢書二十種皆非所經意
者存詩無多
吐屬名雋

春日游青藤書屋登孕山樓謁天池先生像賦贈閑

谷

瑤宮小謫飛仙人餐霞飲溼游凡塵騎鯨一去三百載夕
陽老屋青藤存十年夢想不得到一朝假館逢陳遵春晴
岸幘蕭客入犂硯怪石紛橫陳綠陰一徑入深處古藤十
丈蟠高垣枝柯攪天瘦蛟舞時共風雨相飛奔清池一勺
活不涸乃是天漢之分源歲久豈無蟄龍睡儵游不敢投
絲綸舉首突兀覩庭柱摩挲賸墨無磨磷大書深鏡見筆

力倔強欲與藤篾掀登樓鞠脆謁遺像畫圖肅肅來精魂
開窗四顧萬山入咫尺包孕迷朝昏想見當時抱膝坐論
兵慷慨烏角巾酒酣不識督師貴短兵狹路非其倫先生
亦一諸生耳乃能籌海除奸民徐汪先後同受戮奇功不
讓樓船軍惜乎才大不竟用山人擯落同茂秦後公而生
歎公遇咄哉弄斧班輪門

詩巢懷古

輶軒古不入於越三百之內無篇章山川磅礴毓奇傑詞
壇大振扶輿光後人好古事搜討邦賢一瓣追心香秋水
長天閣云圯崇祠復建龍山岡大書揭藥六君子賀秦方
陸偕徐楊祕監夢寤忽不樂疏乞道士東還鄉酒肆謫仙
人把臂四明狂客胡云狂處士偏師揭竿起眼底頗欲無

文房幽棲剡曲事漁釣隱逸姓氏馨三唐元英先生老不
第補唇已矣頽顏蒼配食嚴陵謝晞髮擊竹如意同悲涼
論忠獨許渭南伯少陵每飲君不忘南園作記亦忠告何
至比黨韓師王鐵厓樂府有奇氣如出金石聲鏗鏘三史
書法待裁定正統論息諸蜩蟬天池山人稱後勁嘉隆僞
體掃牝糠妄庸巨子競樹幟闕編頽首袁中郎千山萬壑
風雅窟豈無健者紛登場代更四姓禩七百六君子外誰
抗行我來弔古事展拜匠門弄斧慚登堂斯人代興有正
派恨無妙手圖西江泊鷗吟社亦漸盡春秋享祀誰烝嘗
西園遺址久衰草殘碑剝蝕埋夕陽主持大雅望來哲斯
人不作心蒼茫

仇炳台字竹屏婁縣人同治壬戌進士改庶吉士有笏

東草堂詩集

日本刀歌和張叔未韻

筆鋒出匣如寶刀文光騰踔層雲高星芒欲動忽不動胸
中鬱鬱龍豹韜先生讀書意不得投筆空嗟時事亟男兒
五十手無柯夜半長吟誓報國誰歟索地思弄武不識中
朝有尙父腰間久佩日本刀酒酣拔地爲君舞使星朗映
風忽狂狂風吹折青琳琅胡爲割地出下策毋乃未見刀
吐光此刀百鍊堪一試海外陳師請從事貔虎能揚大國
威豕狼豕戢窺邊志笏溪今日酒尊開歌辭慷慨有餘哀
刀光如雪雪花落會看直上凌煙臺

袁保齡字子久項城人同治壬戌舉人恩廕內閣中書
歷官直隸候補道贈內閣學士

詩話子久爲端敏公次子佐治海防督旅順船塢工程經營朝鮮頗有建白詩有沈爽之氣

王申春率成酬吉田

少小讀文史卓犖輕常儒悠悠三十載歲月忽已徂朝隨金馬仗暮窺天祿書簿領得餘暇詩酒追朋徒高歌梁父吟醉擊處仲壺持此耗雄心優游聊自娛沈侯曠世才早棄終童繻拂拭到燕石投贈分瓊琚天葩耀奇采開函驚喜俱矯矯一西望佇立以踟躕伯兄事長征數稔治軍儲與君同袍澤驂靳時相須遙遙賀蘭山戰血方模糊三邊苦鳴鏑萬里勞飛芻何日蕩逋寇策勳青紫紆君來一握手共醉城南隅

和朝鮮使趙藹石詩步韻

鳳翽高岡鶴在陰名賢邂逅喜推襟相期戮力千秋事不

負論交萬里心
閭闔正開天
詖蕩滄濱遙望海
重深願君
龜勉崇明德
僑札風流又見今

行經邯鄲

爲蜨爲周作是觀
又來無夢過邯鄲
百年勲業歸蝸角
千古文章笑鼠肝
勉在倫常守兢業
敢云擔荷怕艱難
神仙本不離忠孝
未許忘情一例看

劉鳳紀號竹雲南城人同治壬戌補行咸豐戊午舉人
愿官賓州知州有籀雲仙館詩詞集

月夜閒步

呼吸直通天星晨
落眼前鐘聲隨月度
鈴韻抱風圓筆墨
餘生老頭顱故國緣
還家如有夢鄭重五更眠

將抵建郡

興中忽聽建昌音此日還鄉百慮侵衣紫已虛今世望焚
黃莫慰九原心窮愁恨逐風前起感憤詩從月下吟曾是
兒時游弔處茫茫煙水渺難尋

烽火移家各一方他鄉翻覺勝家鄉昔年奔走同辛苦此
日親朋半死亡孰肯預爲身後計那堪回憶少年場繁華
歷盡風情減況復蒼蒼兩鬢霜

晚眺

何處蒲牢送夕暉一聲催得老僧歸隨身不必游龍恃薄
暮猶多野馬飛枯樹含生仍寂寂墟煙將散故依依風光
畢竟江南好二月春深試袷衣

陳昌年字齡昉一字菱舫吳縣人同治壬戌舉人官戶
部郎中有清溪草堂詩集

卽事

秋風秋雨滿重城難奪清閒冷客情幾翦幽蘭詩骨瘦一
甌香茗酒腸清偶留好友商棋陣愛讀奇書論墨兵小閣
鐙檠挑欲炷滿庭風露又三更

四月初八日

春色隨人類轉蓬峭寒天氣尙東風梅陰子密遮樓翠藥
檻花飛壓草紅催促丁年愁隙影消磨卯飲費詩功怪他
雛燕無離思鎮日呢喃小閣中

吳重熹字仲樸山東海豐人同治壬戌舉人官至河南
巡撫有石蓮閣集

詩話仲樸侍郎爲子苾閣學之子濡染家風博物好
古爲潘文勤所識拔學派沈潛光緒中山左鑒藏家
甲於海內而海豐吳氏與滌縣陳氏福山王氏稱鼎
足侍郎名位差顯又享大年滄桑之後歸然魯靈光

矣詩派出於覃溪論古諸篇賅洽醇雅他作亦藻韻兼具不愧學人之詩

送文信國公鐵如意歌

嗚乎信國公從容殉大節於今五百八十年遺澤猶留一
鉤鐵鐵背銘詞鐫六字曰聖瑞文天祥制詩僧搨墨共流
傳我觀公物見公志公昔生也兆紫雲公及冠也擢狀元
公旣相也宋已去公之死也未五旬烏金一握思風度山
河半壁憑分付賜字新鐫柄上銘知是登科年後鐫我聞
公性初豪華唾壺或以和箏琶又聞公也自貶抑軍中或
佐指揮意自從眞州夜走空坑敗悲涼柴市銘衣帶擊節
高吟正氣歌遺器遺文同百代吁嗟乎物之顯晦信有時
公之遺愛今在茲雲孫小印玉帶硯枯桐尾勒青原詩乃
知物以人重同不朽足與齊簡狐筆良椎武節千秋垂晞

髮參軍公知已琅玕一握恰好相追隨惜哉象奕圖譜四十局竟隨玉屑埋蒿萊嘗將臣節論忠義明季差堪儕宋季鐵工輸與張鼇春姓名猶得傳附驥嗚呼兩公如意從此留人間藝林歌詠成嘉事有宋一代文信國有明一代趙忠毅

勞山白雲洞

千松萬松何離奇千石萬石何纍垂松尋石罅逞天矯石凌松上爭厓屨主峯一石最奇崛俯首乃受松之欺直據其巔監其腦蒼髯恣肆鱗之而左軒一石勢崩刻蛟背如立湘妃危右伏一石於菟卧不甘帖耳形彬彬兩株鵬腳那肯讓騰空四散青珊枝道人何年覲天奧梯以石棧支以移陰崖不借鬼斧劈竄突應是天工施門前雙峯屹相

向嶄如頭角眞疑疑滄溟萬里瀉瀨洞直來腳底如奔馳
我當重九命山屨杖藜猶待人扶持骨酸趾繭乃得到冥
搜不覺忘辛疲西峯虧蔽日易落結璘早射長空輝銀鱗
倒倦雲萬疊謾謾時有西風吹爲我送雲東海去好教雞
唱看朝曦

華巖菴

天風海水聲刁騷忽聞細籟吟笙匏路轉山腰入山腹萬
竿鳳尾縈脩脩鑿幽絕險拓此徑幽菴乃結峯巔茅寺門
那許世人識籜龍鞭起圍週遭青霞斜截斷厓腳綠雲密
補虛巖坳槐龍對盤勢拏搜級盡乃叩禪關遙地僻儘多
花木趣秋深紅紫紛僧寮籃輿纔歇涼雨至四山如沸滄
溟潮我聞二勞勝非一此山此竹應翹翹春雷怒迸蟄地

笱秋風齊掃干雲梢昔訪桃源武陵境幽谷趣與賞簞饒
二十年來繫心目舊懷新賞同相撩鬢絲禪榻感變易夜
窗怕聽聲蕭蕭已知食肉素無相禪有玉版吾將逃

釣龍磯

大石逆波波驟驚驚波撲石石能鳴銳石劍鋒平石砥矗
石壁立圓石疊陂陀石作斜下坂脊露石如高建瓴波來
那論容與否一氣激宕無休停前波方逝後波退後波又
擁前波行高波直越矮波過立波乃壓橫波生奪罅疾如
箭脫筈散溜紛若檐懸繩衝突迅具奔馬勢洄渦圓轉旋
螺形銀濤密濺飛雨射赭岸怒走晴雷轟初疑九天落欬
唾齊迸十萬珠璣瑩又疑千年不化雪颶風迴舞來滄溟
鐵弩不退組練白冰花倒噴魚龍腥自我入山卽傍海斜

陽萬里波濤晴去時曾立磯頭望島嶼遙接帆檣輕回時
纔入湖海底喧逐卽異前番聽此夕正當月之望圓靈如
鏡東南明再向磯頭立縹緲耳目眩亂身疑傾我想子丑
開闢會山腳尙有山尖橫自從洪水盡歸海瀕洞乃與峯
巒平名山豈甘沒波底頭角各欲分崢嶸天吳海若不相
下故以搏擊成紛爭金波漱灩那得渡幾回惆悵移鼉更
仙人空說釣龍去水底時有龍吟聲

西漢綏和雁足鐙歌

長定宮中黃葉秋大司馬用新都侯潛于賂敗曲陽去咸
陽王業彫潛謀是年孝成祚欲盡建元七改儀容修君王
心不化明燭但照宮館羅紈愁鴻嘉以來隆內寵陽阿禍
水傾炎劉是鐙綏和改元鑄相掾丞令名雕鏤不及班姬

照輦道銅沓祇映金塗浮慵來裝點石華褰紅搖春影椒
牆留赤鳳歌殘燦歸路綠熊席暝輝香篝漢宮奢麗那得
見眼界輸與殘檠優史傳孝宣精器械元成以降難追求
建昭竟甯兩雁足乾嘉老輩爭吟謳此鐙後出幸快覩生
晚不抱昌黎憂信都食官建始造臨虞萬歲元延鏤余家
高鐙亦永始三朝較量俱無儔未隨陽朔例頒賜棄擲得
免漸臺陬嘗將古今論興廢始凝須作冰霜篝桓靈先短
漢獻祚熙甯早翦徽欽庥西京元氣蹶此命哀平薄佑將
何尤璉聲紫色託官禮九錫遂欲唐虞侔一朝事關九廟
重美新致累揚雲蓋閱歷殘鐙泣風雨坐對缸粟如懸疣
莒小子雙股詩三十六韻

國僑昔使晉賜莒二方鼎重器古所貴況兼駢以整我觀

傳紀間所載亦井井紀甌齊賄珍襄鐘鄭賂詞壽夢與甲
父郤舒文互省寶鼎雖不一奇偶勢殊等偉哉莒國器至
今餘炯炯二鼎雖已淪雙殷乃猶併文曰莒小子萬年寶
用永徙家弗受文佐祝文考鯁同質非殊范一文乃異皿
紋迴雲點黑班留苔翠冷枵腹略類瓠象圓欲說餅彎環
形抱珥樸素義尙褻黜若髹點漆澤比金出鑛先子寶其
一珍重如搢珽常念延津劍何日得合並李丈念兩美不
合心終耿連城乃歸趙商於不欺郢瑞若聯珠璧斷豈續
頸脛遂使千載下藝苑快雄騁嘗攷莒世次略可得其梗
茲平及郊公七主生非挺獲孥季友歸出僕行父請務婁
及滅明奔執不自拯密鄆城恃陋防茲地非迴蝸角國難
爲强鄰況壓境豈類漢孝宣技巧夙精警乃與所制器今

古同彪炳什襲重綈錦裝潢斲檀癭非獨虞壺儷直與齊
罍逞子產號博物晉賜始管領我不黃熊辨兩器乃獨乘
眾金同紛羅譬若囊出穎離合千百年蒼萃乃俄頃摩挲
發古思作歌志深幸

陶城堡

推篷日對水潺潺沙鳥風帆自往還東望數峯青撲面不
殊江上六朝山

葛宏墓

西去麻鞋謁至尊烽煙何日靖中原故人盡節難迴首怕
過葛宏化碧村

和韋叟歸耕釜麓出都感賦元韻

江水茫茫山色蒼昔年行役又同行六千猿鶴悲君子八

百桑株學武鄉略仿買田蘇玉局相偕歸隱孟襄陽也如
鸚鵡前頭意雲樹無言但淚浪

伊人露白更葭蒼賓雁俄看起一行共歎崦嵫新歲月幸
聯桑梓舊家鄉詩人歷下推庭實野語齊東署弁陽說我
故園耆宿事風流文達記滄浪

淵靜川韜叟韻贈詩依韻奉和

湘纍何計問穹蒼雨雪其吁攜手行詎有南樓風月興且
尋東郭水雲鄉前年紅樹游蕭寺此際黃昏是夕陽誰是
濯纓誰濯足各將心境取滄浪

唐拓武梁祠畫象殘冊爲李一山題

古今以來推畫手惟輪始自東西京自從齊魯逮巴蜀前
人箸錄垂典型元嘉元年武氏石天水以後蒿萊平歷金

元明乃復出百六二象猶發劍此圖僅存十四幅唐時舊
拓傳溪藤憶十一齡戊申歲大梁隨宦曾眼經越七十載
歲戊午我八十一重開滕雖經崑燄火不盡古香古色仍
奔騰爾理賦若截肪細麝煤重比沈雲崩國初題自朱查
手小石帆亭集大成竹垞山舟各七一尙書梁公八旬盈
雪疆持贈秋盒手聲價直許同連城東洲月齋兩鉅製後
有作者難抗衡惜哉陳壽老王文敏兩巨眼墨緣未得傳
風鐙近人重搜獲一石氈蠟畫靜聞登登喉焚晉主激宣
孟知與賢母咨王陵擊磬有心來何蕢節義杵臼兼程嬰
地不愛寶並世出紫雲山色增崢嶸我聞文翁高映張收
作石室帝王聖哲摹畫無不精沈作誥寓簡王遜少帖云
漢太守張收畫三皇五帝三代君臣至今跡相不得見孝
與仲尼七十弟子畫皆精妙可觀

堂郭巨三十留題名其餘東麟西爪互顯露太尉沛相述
敘文清明馮緄六玉丁房峙雙闕李翕五瑞澗池尤著名
此圖七聖一暴四孝子俯視他象只如中下乘家臧武梁
題字如隸釋小蓬萊閣注字明珠瑩白樓先生昔贈先閣
部慘遭劫火此竟逃天刑李唐至今一千有餘載得見祖
本眼福還相矜昭陵六馬道子佛唐畫當時知服膺蔡家
有鄰韓擇木唐隸當時應稟承復齋款識並入仲安室行
齋二妙文字今猶馨前人歌詩已窮精奧義賤子附尾鑽
紙如凍蠅

朱舊瀛字芷青大興人同治壬戌舉人歷官河南知府
有金粟山房詩鈔續鈔佛岡宦轍詩汴游冰玉橐周
濱集陳州集素園晚橐上瑞堂集

詩話芷青官成均三十年光緒癸卯後宦粵宦豫隨
地有詩以名其集辛酉鄉舉周甲取鄉書藝林上瑞

語類所作日上瑞堂集其詩序隱以放翁自況讀放翁詩集有云千古吾鄉詩事重鏡湖一老壓中唐蓋正青先世固越人也

答李萼客農部 慈郛見懷

一篇勞贈我疎磊見襟期醉與白雲契吟惟芳草知世事
慨如許古人交似誰鑑湖朱處士深荷李頎詩

廣王維西施詠

多少蛾眉去吳宮顰未伸不知嘗膽輩可念捧心人

與客論詩示二絕句

州翻鸚鵡競奇新閒詠於今亦少真縱使雄才推一世不
關情性豈詩人

偶隨人境寫悲愉時代遷流體格殊我有真情浩如海滄
桑萬變不能枯

王子獻同年

繼香

權河南府篆未接任旋省卒於差

次距余來汴不數月也客偶談及愴懷舊好輒成長句

玉堂美人來大梁翠蘊下闌蓬壺香風雅粉澤似前代再
覩睢渙呈文章內史長才迴清異卧閣猶堪理羣治朱輪
紫馬何紛紜坐使鸞皇不一試多情好古兩相憐竹里筒
貽過百箋祇今伊水仍東注子晉歛笙何處邊金薤琳瑯
稱世寶所著金石錄最夥鏡湖待訪叢殘藁我來梁苑亦枝官爲
愴君遊乞歸早墨如果蛻君其仙歌期君聞情浩浩君有墨蛻

圖又自鐫小印
日梁苑枝官

閒遣

施萊叢中自葆真懶從詹尹問前因老將及耄甯爭智生

本多憂任賀貧恥效縱橫欺世輩甘爲勤苦授經人握蘭
總受皇天眷肯道儒冠誤此身

劫灰幾度閱人寰尙戀觚棱住此間養少青田憐鶴瘦封
辭碧海樂鷗閒儘堪比擬聲嘶叟無復逍遙供奉班太息
時流厭常道競隨徐市訪仙山

勞乃寬字偶庵桐鄉人同治壬戌舉人江蘇候補知府
詩話偶庵玉初兄也篤厚勤吏事初官北河爲大名
同知舉茭捷竹數載勤勞晚乃改官吳中未及版授
而卒詩無專集惟其赴官蘇州時與玉初
酬唱合刻爲歸棹填箴皆七言絕句也

南還示玉初

機雲入洛舊齊名倦鳥思還約耦耕願爾早將塵鞅脫一
帆逐我闔閭城

還嘉興視玉初疾

白頭兄弟話燈前舊事依稀記昔年怕上芝橋橋上望山
邱華屋倍淒然

宏文館外少人行寂寞門闌碧蘚生記得白袍如鵠立滿
身風露聽呼名

楊柳灣頭噪晚鴉金陀故里夕陽斜莊嚴獨有精嚴寺卻
少牆陰梓樹花

周長庚字莘仲侯官人同治壬戌舉人官彰化教諭有
周教諭遺詩

贈林琴南孝廉

柴門平掌練波流斫膽淋池尺幅收瘴海才名珊網老華
年肝膽劍花秋灑頭哀角寒詩夢劫外殘烽照杞憂淒斷
瀛江新樂府西風吹淚滿南州

玉山

在番社人迹不到筍輿過諸羅望之若一片白玉橫出羣岫間或以爲積雪也

玉山在天不在地山半噴雲盡下墜雲氣阻塞人不前護此太古未破天水玉磊砢堆山巔山色一白全化煙或云此山寒冰穴壓盡盤古以前雪義和鞭凍輪不熱坤維脈與太陰結太陰所固日無功寒氣一東東海東世人不知呼作玉幾人親插峯頭足

火山

在諸羅東十餘里

火維眾山插天險天半熊熊起烈燄火光所觸金鐵流陽氣鬱勃燔炎州雪威不到滕六死天地長夏無冬秋或如金釭挂天半燭龍銜燭照銀漢或如野燒橫秋空天吹不動海底風飛光上騰影倒射萬壑一色作奇赤有時石罅濺沸泉一噴一吸泉生煙響泉自噴火自爆火水爭穴互

相搏生硝黑氣烘馬牙坐恐癡臺坤軸灼當年補石天
齟齬宗動擲下洪鈞鑪陰陽餘炭燭未熄照見滿海紅珊瑚
臺北稻江樓和友人韻

際天黑箐墜斜曛龍氣騰空作火雲山勢百支垂海盡江
流雙派到樓分豪游有約青絲鞵韻事無心白練裙欲作
逢場竿木戲姬隅蠻語笑參軍

丁謙字益甫嵎縣人同治壬戌舉人官象山教諭有寄
鷗居詩

詩話益甫精輿輿地所著曰小蓬萊閣叢鈔於歷代
史書西北地名證以今時中外輿圖確鑿可據多訂
前人疏誤詩不多作五言樸老

幽居

幽居忽不樂遠游南山岑山光迎暮靄歸鳥皆投林
簌簌

澗上松風過聞遠音泠泠澗中水浣我塵世襟山鶴有閒
意山鹿多野心曠然一相對機械何從侵靜境觸斯悟幽
念息逾深安知太古上非復如當今請從彭澤公一撫無
絃琴

種竹得幽趣種蘭有幽芬孤懷澹相寄非期世所聞東鄰
有隱士灑然離俗氛朝夕過我游結契連風雲贈君流黃
機報我蜀錦紋錦紋織奇字密意通殷勤殷勤那敢負誓
絕猶與薰春花與春草向榮各欣欣相期共樽酒薄醉眠
斜曛

刺促行

刺促復刺促人生百年鳥過目前有一樽酒後有一叢菊
把菊飲酒安事役役迷陽生途行且傷足山多虎豹水多

蝮時時飛而食人肉請看東門悲牽犬何如生來抱黃犢

題夏閭枝青鐙有味圖

至文肇六籍洙泗執樞紐魯論四教垂文實居其首天地
雖廣大萬物雖繁茂厥理靡不包一一資析剖譬如城門
軌萬馬此輻輳自遭秦坑焚漢興葺殘漏訛謬日漸增糠
秕遂雜糅厥後流益分笙簧百家奏經史子集區金石梨
棗壽儒者生近今簡冊如山阜區區兩目力詎易徧尋究
又況是非間錯互眩妍醜出主或入奴輸攻而墨守誰能
折其中轆轤辨紛糾夙昔有志斯披誦就窗牖熒然夜一
檠不覺柄移斗所嗟識趣卑衣食復奔走所學無一成蹉
跎竟誰咎閭兄勸學人翩翩紹華胄羣摩日不遑未恃得
天厚我時共折證懸河資辯口醴然心得言豈屑拾牙後

示我青鐙圖小冊怡藏袖開帙肖清神夜景亦深秀梧桐
三兩株竦立秋光候蕭蕭竹幾叢掩映茅亭右斗室煜孤
鐙書外百無有恍聞金石聲琅琅激林藪我時將南旋惜
別同心友敬當臨歧言得勿附瓊玖相期各努力業成致
不朽此味殊酸鹹知音果誰某還擬問銅荷歷歷心領否
田延年字友羲渾源人同治壬戌舉人官長子訓導有
希達齋存藁

詩話友羲幼敏悟初爲試律以天寒落日淡孤村爲
題得句云樹影上牆枯塾師賞之謂他日必以詩名
晚爲校官乃專意爲詩以高達夫五十能詩自況因
顏所居曰希達齋論詩以爲有威斯動萬有不齊一
言以蔽日真而已故其所作權奇磊落必自胸臆中
出令子琮應璜爲山西令德堂高材生王牧臣學
使及屠梅君陳伯平諸君皆
深器之蓋得於庭誥深也

卮言

殘月如垂鉤潛鱗罷游戲新月如張弓征鴻側身避蟾兔
本無心魚雁胡多事信從海上來書自雲中寄拆書復見
信就中有深意上言疑其形下言畏其勢

夏蟲難語冰井蛙難語海是固習之偏無乃性不改天地
一何寬嗜好非一端唐虞相授受巢許樂考槃武周仁人
粟夷齊乃不餐居身貴特立處世貴達觀所以古聖賢不
強人所難

己卯重陽前五日題許村雙松寺後禪壁

二十年來此地違舊時樓閣尙崔巍喬松千尺白雲挂法
鼓一聲黃葉飛拾穗亂聞村婦語敲門仍識老僧歸西風
刮面驚霜肅惆悵窮簷未授衣

健婦打虎行

婦爲吾郡南山人姓氏無考里人傳其
軼事如此予懼其久而弗彰也因作詩

以記之

林深月黑風撼山健婦乳兒茅屋間虎聽兒嘯奪門入虎
入風迴門自關健婦見虎膽如斗手擲小兒姑向後急取
鑪中未燼薪帶火狂呼驅虎走人旣抽薪虎欲啞轉身一
揮鷹隼疾毛焦肉灼氣已衰爭奈門關不得出大吼一聲
天地秋人來虎往不能休舉薪亂擊虎狂躍滿室紅飛火
繡毬夫從外至疑有寇見虎猶疑他野獸虎趁門開逸且
奔婦幾一蹶不可救吁嗟乎健婦雖健婦人耳胡爲彊梁
遂至此此時健婦知有子知有子虎可制見虎時騎虎勢

登大行絕頂

突兀壓神州蒼茫據上游羣山皆北向沁水自南流地遠
三川見天晴萬木秋故鄉在何處回首白雲浮

張祖同字雨珊長沙人同治壬戌舉人有湘雨樓詩鈔

詩話雨珊工填詞藏香片玉葵園選湖外六家詞雨珊其一也餘事爲詩與弟怡秋齊名湘雨嶽雲並爲時重其詩以杜爲歸兼涉韓蘇之勝惜所傳不多蓋專情倚聲略存梗概而已

小孤山

潯陽之水分九派匯入大海流洶洶彭郎磯下忽一折小
孤屹立森當中天門閭闔影詖蕩倚傍謝絕蓬萊峯江山
半壁阨天險萬壑帖伏不敢東我來正見白日墮石級百
仞愁難窮山神拱揖若相告昔歲兵革殊怱怱敵人何由
據要害豈有飛渡無交攻先聲從來貴奪隘誓死併力臨
其衝樓船蔽水箭滿眼彭公颯爽人中龍巨雷翻空烈火
沸晝夜但見江光紅撼山山動賊盡潰黑雲摧拉天無容
出師以來數百戰湘軍此舉成大功吳頭楚尾固筦鑰腹

背自興淮淝通自從江南殄殘賊長鯨敢作洪濤風浮雲
朝暮互起滅太息尙有南飛鴻移山疊浪挂帆席隱隱聽
打寒煙鐘

揚子江

十年烽火金山寺孤棹蒲帆鐵甕城日暮魚龍紛出沒雲
邊鸛雀自飛鳴江流萬古無歸日野沒千村有哭聲幾處
樓船笳鼓動極天風浪一傷情

夜泊螺山大雨不克謁王子壽丈悵然賦詩

邁園咫尺隔惆悵客裏輕舟泊洞庭獨夜雁歸天漠漠孤
洲風急雨冥冥別來魂夢江湖闊老至詩歌涕淚零清曉
推篷一回首楚天猶近少微星

葛岳喬自晉入都客中見訪因贈以詩

離憂七載忽相見急問萍蹤意苦辛上黨地爲天下脊王
郎訝屬眼中人不堪歧路憐詞客且喜他鄉奉老親幸際
聖明須努力天涯慙愧一儒巾

九華山

長風縹渺赴瀛海吹落數朵青蓮花孤舟雪盡正東下雲
外玉屏張九華天低積鐵壁孤倚梯石橫嵌蹋龍尾豫樟
十抱翻回颺俊骨無聲半空起傳言靈氣鍾盤陀上寺下
寺雲嵯峨玉京羣帝白晝下亦應旌旗相蕩摩卻瞻齊山
渺難識洞天卅二無顏色虎豹噤聲林木盡兵戈世外仍
消息日夜山邊走怒潮落溪荻港蕭條極興衰之事不足
陳江翻岸倒空千春茲山得名自李白悵望書堂無復存
興酣落筆凌絕頂只今誰是謫仙人

東西梁山行

梁山峭拔分東西壁立斷岸懸晴霓兩峯對面勢欲搏巨
靈一笑扶天梯深潭錦鯨作怒吼長風擊碎青玻璃羣山
俯首盡退讓挂笏豈克相排擠金陵上流固鎖鑰胚胎鑿
空開坤倪槎枒山谷繡眾綠古色斑剝何萋萋我行六月
忽到此小舟一葉如鳬鷖江流鏗銅儼互答直視絕頂愁
攀躋舟師忽爾眼流淚向我稱述色慘悽咸豐之初歲癸
丑拏舟艤泊前邊隄須臾賊兵萬蜂集帆檣林立鳴鼓聲
登舟劫掠斫篷纜大眾何敢輕訶詆老者殺戮少者縛血
流江面聲澌澌我時惴伏未能竄一賊捉人如捉雞梁山
荆棘恣搜索怪鴉暗哭烏夜啼賊中飄零倏五歲逃亡九
死踰山蹊間關乞食返鄉國手足破裂面目黧風饕雪虐

衣敗絮入門涕泣見老妻火伴十數走相慶急佐杯酒盛
鹽齏早知波濤兀險惡曷不壯歲扶鋤犁黃金不能救身
命江湖傾蕩悔噬臍江南賊盡復過此魂魄猶悸道路迷
我聞斯言心語口詎獨爾輩聲淒淒兵戈異數苦糜爛城
郭戰鬪戈橫提錦衣玉食盡何在紛紛骨肉生乖睽東南
承平近十載土人歸去無依栖枯蘆敗葦支破屋日愁秋
漲淹青泥蒿萊四野田盡廢新種數畝多稗穉吁嗟瘡痍
待興復好望長吏相招攜長江擊楫轉愁疾拔劍更欲驅
鯨鯢山神肅然若拱揖隱放一綫潮頭低揚帆直上亂山
走仰見明月明如圭

江上

滿目浮生苦清時景物非岸邊民舍盡江上估船稀暮色

無秋樹寒煙土客衣潯陽知未遠海舶去如飛

泊九江

帆落匡廬近天低湓浦流鳴猿隨雨斷過雁下雲愁亂定
嚴關摧秋清冷舵樓海邦人種柳高舞九江頭

浙西余生久客楚南今將從軍塞外詩以送之

亂定仍爲客悲來敢惜身行辭萬里路不作五湖人楚越
隔塞遠伊涼奏曲新封侯殊未卜鼙鼓覺傷神

桃源

入山秦人曾避世流水今日渾忘機野雲縹緲自來往仙
洞幽深疑是非坐愛瀑布午陰直尙餘桃花春暮飛此中
信步不知遠重問前津知者稀

遠望

平原望遼闊孤鶴不知還煙遠欲無樹雲微似有山叢陰
連百粵天勢落重關南斗長沙近蕭森未可攀

黃體芳字漱蘭瑞安人同治癸亥進士改庶吉士授編
修官至兵部侍郎降通政使

詩話漱蘭樸學清修尤以敢言著聲視學江蘇荆南
菁書院集諸郡邑高材生肄業其中晚歲迭主信陵
敬敷講席子紹箕從子
紹第並入翰林貢時名

信陵書院作追述者獻留別院中諸生疊仙屏河帥

韻

颯爽鬚眉太史文原嘗俠氣並時聞監門上座猶常事爲
國申威最軼羣安得屠兒誅嘆喑并將購使痛鋤耘薦紳
莫笑衣冠倣此輩肝腸不負君

草疏飯客淡彌親巾袖高談亦偉人車似雞棲偏疾惡釜

青山紅樹白香湖，免爲君王再荷戈。
返哺儘聞烏鳥樂，獻嘲嗟幸草堂無。
水中金石看千變，谷口池亭記八愚。
猶有高名動寥廓，著書憤世陋王符。

翰墨場推老伏波，故人招隱出煙蘿。
軍籌檄筆雄誰並，銅柱勳名勒幾多。
拜表元戎聞薦達，罷官下淚自蹉跎。
蕭然百粵經行地，祇草龍蛇落澗阿。

悔別師門三十年，西州重過淚潸潸。
遂良早白清湘鬢，供奉休迴賀監船。
曾感吐茵容國士，共來持菊薦江天。
平生風義悽懷甚，更苦城危夜雨懸。

河鯉江魚各自流，勞君高興動扁舟。
不辭千里追年盡，相引一觴爲道憂。
老大心情雙白鬢，嘯歌天地總青眸。
追歡卻有前時感，力與排愁未解愁。

雨絲風絮黯平臺此別分襟更可哀
目極天涯孤客返夢懸江表尺書來
苦懷未忍從深訴慰語重游約後同
白髮故交寥落盡不禁清淚溼蒼苔

千里飛書自告亡一驚斷盡故人腸
臨危所眷惟知己閱世如流益可傷
留集東林謀不朽修文碧落恐猶忙
素車行哭吾無及慚負人間范與張

濡淚吟成紀實詞還如杜集有嚴詩
騎鯨天奪胡偏遽捫蝨談深故可思
一例文章憎命達從來孝友是男兒
龍驤鵲起俱塵土且讀林宗第一碑

李嘉樂字憲之光州人同治癸亥進士
改庶吉士授編修歷官江西布政使有
齊魯游草

詩話憲之起家二千石以介節自持與
菊圃布政用清鑑堂尙書秉衡齊名皆爲
閩文介賞拔時稱三李

憲之頗耽吟詠一官
一集頗多情婉可誦

謝袁子久觀察贈馬

驢背尋詩味飽諳擬將行李一囊擔馳名已覺輸中駟贈
別偏勞釋左驂備位八駟君可致起家五馬我何堪鞭絲
遙指青州路更駕毋貽舊友慙

前堂古槐作歌張之

老槐蒼莽覆高閣疑服仙人不死藥何時裂腹樹中分一
半生機尙自若卽今得半氣輪囷南柯獨伸龍臂攫上有
密葉干青霄下有垂枝張翠幕故老傳聞不計年自有此
州根遂託日久羣驚有物憑人過其下孰敢詭煙雲百丈
勢冥冥香火一龕靈灼灼風來飛舞厚將崩昔人已鑄鐵
經縛我到更增一木支豈惟老物傷搖落千百年亦重留

貽十三賢或經摸索守吏雖無齊令嚴得人差免魯邦削
政餘頗愛此扶疏視作鼎彝慰寂寞廣蔭真看可蔽牛通
神果少來棲雀化身癡想作槐安古而無死何如樂

趙國華字青衫豐潤人同治癸亥進士山東候補道有
青草堂集

詩話青衫作宰山左頗著聲績旋以道員待闕先後
權領廉使釐運及濟東分巡終未得與除聽鼓應官
暇則優游文酒古文敦獎孫柳穆自成一子亦復兼
工駢儷詩風骨既道藻采足以相發倚聲取則姜張
多斐然可誦

尋靈巖寺遇雨

朝出泰安郭暮抵靈巖原好山似賢主延客開籬樊屏翠
何窈窕側側松雲繁前溪忽杳靄白雨來山村澗水砉然
急與人爭路根山輿蹶四足泥涉如跛黿行行且復止疏

滴猶霑轆草店幸可卽徒御猜黃昏斷蟬起林薄明霞紅
在門層嵐晃新沐對爾酬清尊

翠微寺

石徑蕭蕭裏鐘樓落翠微暗泉穿竹出薄雨入松稀山鳥
吟黃葉秋僧補衲衣從來清曠境未覺此心違

舟抵廣陵

江浦雁聲秋西風木葉流一帆下淮水三日到揚州不遇
王司理誰爲把臂游碧簫明月夜獨上酒家樓

丹徒江口晚望

日暮羣帆集長江此一隅濤聲來白下山勢走丹徒寺遠
鐘依約雲寒雪有無射堂游勝地樽酒不愁沽

京口

萬里西來江水聲
北風吹客放帆行
山連宋武丹徒宅
日射孫郎鐵甕城
人物遠淘千古浪
戈艘近息十年兵
岸頭蜃氣何由在
不覺中流憶祖生

游義嶺遂至趙秋谷怡山舊園

四山松影掩城廬
一路泉聲曳筍輿
南郭堞橫青黛裏
北亭觴盡白頭餘
幾人下馬尋秋草
當日譚龍已索居
太息荆坡無恙在
未應竟自付樵漁

錢塘舟中遇張振卿典閩試歸

仁頻葉大荔支甘
江上相逢秋正酣
聽徹玉蟾宮裏曲
筍簞涼月下西南

萃縣城西見荷花

縣小常可喜
晨出暮必至
行行煩暑散
颯然寡車騎
隱約

城西隅田水湛明媚迤邐三四畝藕花出禾穗邑境久荒
瘠見此足心慰立馬暫向前宛爾納涼地參差綴香梗野
風滿翹翠亭亭處幽靜喧戲謝童穉他日吾不知咫尺愧
爲吏儻有高懷人獨清在衡泌

田家

田家始築場禾黍刈成束老農知稼穡護惜甚珠玉日暮
牛羊返泚泚角相屬稚子合柴扉茅檐映炊燭席地少長
集新味野蔬足早晚官賦完坦然脫榮辱人聲稍漸歇雞
犬眠亦續淡月入村來園林靜寒綠

山行

驅車入叢山行行夕陽暮人迹杳然絕取徑儻已誤亂石
來相難崎嶇有餘怒返照瞰高草喬木與前路垂崖似古

門想像儼深固鬼魅良可愁神仙亦堪怖我生貴平易不欲得奇數言念采樵子願因覓棲住

潭西行贈柳生文洙

天根舊詠城南柳俠卿亦謂真吾友濟南山水方英多嵯峨揚波何不有柳生好劍兼好書潭西半畝從僧租爲招同志二三子掃軒觴我傾新沽其時落葉生除宇隆寒狡猶詐秋雨戴笠言從窈窕門佛樓一片風鈴語離離淨綫梳垂楊瓦亭四角迴虛廊七十二泉綠如鑿當年桂老殊平章引澌激溜窅然細潺湲珠玉隨圓方五步十步作人立峻嶒瘦石窺琴牀春紅秋碧各已謝小橋疏竹攢橫牆庭陰倒罌羣諠絕宛與栖身向巖穴插檻紛看碎瑣雲披簾坐聽玲瓏雪自古清流清可人無疑諸子來怡悅窮年

永晝乃據此吾將妒爾難爲別還山他日不可求引領飛
空捉明月

登遵化城樓

虛樓足清暇夕日忽已曛斷雁入黃葉遠山齊白雲邊城
不可見登眺空殷勤聲鼓中原滿秋笳誰忍聞

任城太白酒樓

當時李太白足迹半中原賀令一杯酒茲樓千古存繞城
沈市籟平檻渡帆痕此日風流地憐才誰更論

湖上

美人桃葉渡名士木蘭舟垂柳綠平水夕陽紅在樓草間
蝴蝶亂花外杜鵑愁買醉吾非恡當春孰共游

車中望腰帶諸山

斜陽大道白沙明
鈍馬單車過縣城
鴻雁北來晴有數
亂山東去老無名
謀生安得田夫子
誓死曾聞戚總兵
絕塞由來關鎖地
何因坐放虎狼行

送王竹菴北歸

寒食天涯遇故人
湖城旅思作平分
綠波夢好慚江令
春草吟成對范雲
失意宦如花耐冷
知心別似雁離羣
樂源門外千條柳
爲語依依遠送君

遠戍曲

萬里龍沙羌海濱
十年羽騎滿邊塵
數聲新雁長天暮
無限金閨望遠人

許玉琢初名賡颺字起上號鶴巢吳縣人同治甲子舉人歷官刑部郎中有詩契齋詩鈔

右置盆花列酒器吟嘯其間雖仕亦隱立品端介書學魯公駢文倚聲無不入妙卽以詩論氣格高古蘊寄深微哭弟千二百言及忌日自述諸作至性真情流露

言表

同農門度孫家嶺過下天井序之寓齋

朝光麗陽崖秋氣肅晴巘巖桂金英霏佳招及茲踐孤嶺
阻重深躋步不辭蹇曲徑修蛇懸碎石流九轉仰企勢踰
迴俯拾意轉坦露磴舉茅篁雨斑貼苔蘚直視瞻遠神危
坐息微喘及巔梯已窮下坂步難展振衣重踟蹰慎哉失
足免

人語墮木末雉竄起綵笳秋草沒樵磴積水生沮洳意行
出叢薄芳氣動衣裾回首辨來徑高與銅井俱邱亭闢門
戶官道交槐榆此間地稍窪方池碧縈紆益益委廢圃華

表森路隅螯井石闌淨翠地秋陰鋪款款入深巷乃造幽
人廬小團一甌熟鑪煙散庭除

秋夜詞

山月下簷秋氣森孤花泣露棲牆陰畫樓恍惚非昨夜躊
躇無語停瑤琴瑤琴豈爲知音惜一水盈盈共明月伯勞
西飛孔雀東各有天涯怨離別

抱冲丈海天覓句圖

萬竈攢煙火千軍沸汐潮幽人獨高寄奇句出塵囂白日
煖將匿青山誰見招浩然發長嘯極目送盤鵬

空闊俯城闕窈然思以深鵲鸞京國夢猿鶴故山心多難
居同谷無聊動越吟平生師友誼牙曠託知音

聞絡緯作

鐙欲盡夜光微巧婦驚寒亦下機惟有緯娘聲不斷無
人知是歎無衣

丁蓉綬字竺雲長沙人同治甲子舉人官戶部主事有
磨綺室詩存

阻風

一困沙泥一上天欲參真諦識前緣年時怨羨都無著見
慣人家順水船

感秋

西風挾愁來一歲一相侵引手掬秋意怙曠不可尋胡爲
愁因依蒼然與之深得非纏縛懷乘此蕭颯音傾膏入塵
緣迫使煎其心靜思了能悟百慮澄孤襟君看中天月萬
里雲無陰

朱鑑成字眉君興文人同治甲子舉人官內閣中書有
題鳳館詩集

大風雨泊鎮江

萬里江寒雨氣腥壯游有數幾人經魚龍噴沫天真醉鶯
燕驚曉客獨醒城闕風雷沈鼓角海門潮汐走精靈金焦
獨浪聲如舊可有英雄枕劍聽

沈昌宇字子佩武進人同治甲子舉人直隸候補知縣
有泥雪堂詩鈔

寶盤歌

噫吁嘻寶盤之來乃自洪河之東太華之西沈埋光景二
千載潛匿不啻蛟與螭岐山崩頽灞水竭此寶乃一鳴其
奇土衣厚裹十重甲苔蘚蟠駁鱗之而含垢忍辱無不可

奚必汲汲求人知今日出世母乃早我爲寶盤痛哭垂漣
而神物久晦豈能不一顯所惜今也非其時成周之盛稱
宣王中興令辟開明堂命將北伐天威揚驅逐獫狁過朔
方歸來紀績書旂常乃作重器垂輝煌祭告清廟牽駢剛
股肱二號同趨蹌是時大狩岐山陽伐石作鼓志憲章籀
也惟史古之良刻畫金石尤所長勒茲盤銘傳無疆鉤磬
作作生鋒鋌魚魚雅雅詞軒昂侯其禕而駿烈張歷十四
代騰其光我見此盤在徐氏良二千石有孫子靈光道自
日邊來奇氣驚看室中起嗚呼咸陽鐘簋銷爲泥承露金
莖早摧圯自從周鼎淪太邱空令千人沒泗水滄桑變易
陵谷遷怯物西京長已矣惟有此盤今巍然精銅百鍊重
且完長牙崕呀辟邪怒漬血朱碧龍文斑叩之其聲中無

射琅琅摩戛鏘八環長廊密室相掩護猶有寶氣徹夜騰
星躔我爲此盤發三歎摩挲百偏心茫然若非埋滅在九
地似爾光怪何以能久全不潛而見際時變頃刻城郭生
烽煙盤兮盤兮爾室已易主得無從此傷其天此盤閱世
二千載笑我小子言詹詹劉爭項戰見慣等閒事況此么
麼蠻觸何憂焉我思及此重歎息人生難與金石同其堅
噫吁嘻寶盤之來乃自洪河之東太華之西側身四望心
依依西方美人我所思

哀吳閶

西風蕭蕭梧葉秋梧宮寂寞吳王愁一番榮落隨時易百
代興衰逐水流吳閶自昔繁華地鬱鬱層城發佳氣秋晚
楓江蟹稻肥春深虎阜鶯花麗樓臺煙雨夢南朝舊苑長

洲草未凋鐙火夜歸青雀舫酒旗晴護綠楊橋吳姬生小
能歌舞打槳乘潮自來去子夜新聲按綠幺丁香豔錦纏
瓊樹水色山光無盡妍踏青車子採蓮船慢驚烽火三千
里已盛煙花二百年人間祇覺陽春好天上那知霜雪早
白馬環江吼似潮紅巾徧地屯如草大帥逃威過晉陵督
師車騎盡東奔倉皇關效雞鳴度慷慨陣呼爪士登孝穆
才華信殊眾堂堂開府聲華重債帥何期竟倒戈巖城從
此遂摧棟闔闔西南軼蕩開金戈鐵馬震如雷可憐槨墓
鳴夷去又見稽山甲楯來短兵狹巷相馳突白屋朱門徧
搜索廉使空屠朱亥刀縣官都化王喬舄百雉崔巍九四
城如何蟻賊竟縱橫開關到此成延敵失策於今悔募兵
分班競占吳宮宿吮血磨牙厭人肉上國何因患豕蛇荒

臺祇見游麋鹿館娃名號又重新浪蝶狂蜂慘變春捉得
雛姬充養子傳來羽帖署真人服妖徧地迷紅紫伐鼓縱
金亂盈耳蠻奴厮養錦纏頭蠶戶長年銀約指眞娘墓上
月如霜響屨廊前草不芳杜宇淒涼嘒碧血燕泥零落墮
雕梁百年名勝歸何處金粉山川變塵霧漁父空尋避世
人參軍漫作蕪城賦君不見金陵自古帝王州花月秦淮
一旦休又不見西子湖頭好山水柳色鶯聲今已矣江山
形勝總堪哀長使英雄心事灰祇有胥江嗚咽水闔廬城
下日徘徊

狼山大觀臺

他鄉經亂獨登臺萬里江天眼暫開山勢遠從京口落潮
頭高過海門來百年世事翻棋局半壁桑麻換劫灰日暮

寒林霜葉下秋空一雁發聲哀

九派源通巫峽上五山地盡大江東古人去我日沈嶺新
恨滿懷帆飽風憂亂閒身烽火外悲秋清淚死生中義烏
遺墓空衰草淪落天涯慨爾同

宮詞和顧緝庭同年

太液春波似海寬玉人無數倚雕欄長門十載朱顏改鏡
裏妝成不忍看

闔門新敕待傳宣粉本先呈進御前多恐霧中花氣雜畫
師並不愛金錢

陌上春風拂路塵穠桃豔李鬪芳辰可憐繡輦司花女不
及章臺走馬人

晚晴簃詩匯卷一百六十一終